

**Ulloq 26. maj 2017 Katuami Landsrádit siulittaasuata innuttaasunit qinikkap siulliup Erling Høeghip qinigaanerani ukiut 50-inngornerat malunnartitsiniarnermut atatillugu Nunatta Katersugaasiviata Allagaateqarfiatalu pisortaata Daniel Thorleifsenip oqalugiaataa**

Asasakka najuuttusi tamassi, arnat angutillu!

Landsrádip ilumini qinikkamik siulittaasoqalerluni ukiunik 50-inngornerata malunnartinniarneqarnerani naatsunnguamik oqaaseqarnissanni naleqquttuusoraara demokrati pillugu oqaaseqalaassaguma. Soorlu Inatsisartut siulittaasuata tikilluaqqusinermini oqaatigereera aatsaat 1967-imi Landsrádit iluminni toqqakkaminnik siulittaasoqalerput.

Ukiut arlalialuit tamanna sioqqullugu eqqarsaat taamaattoq inunnit taamatut eqqarsartunit qaqqinneqartarsimavoq. Taamanikkut kalaallit qallunaanut naligiisitaanissamut suliniarnerat ilungersuutigineqarpoq, ukiorpassuarnimi tunulliuqqarneermik misigisimanerat annertusiartuinnartumik eqqartorneqarsimavoq.

Taamanimit ullumimut pissikkutta sumummita ullumikkut killippugut? Demokratimik aqutseriaaseqarnej aalajangiussimasarput qanormita ippa.

Aqutsinermi politikkimilu demokrati tassaavoq inuit tamagit oqartussaaffeqartillugit ingerlatseriaaseq. Ulluinnarni inuunitsinni, sulinitsinni, angerlarsimaffimmi, taavalu eqqarsariaaseqarnitsinni demokrati aamma inooriaatsimut attuumalluinnarpoq.

Demokratiskimik inooriaaseqarutaa aalajangiisarnermi, suliffeqarfinni suliassanik agguassinermi, angerlarsimaffimmi pisussaaffiliinermi, qitornatsinnik perorsaanermi - tamagit oqartussaaqataanerat pingaartissavarput. Taamatut demokrati aallaavigalugu aqutseriaatsip, inooriaatsip ingerlatseriaatsillu akerleraa kisermaassilluni aqutseriaaseq inooriaaserlu.

Inatsisartunut qinersisarneq qivialaassagutsigu ullumikkut Nunarput ataatsit qinersiviuvoq. Siornatigut qinersiviit ilaat isorliunerusut immikkut isiginiarneqarlutik sumiiffiillu inukinnerusut peqataatitaqarnissaat qulakkeerneqarsimagaluarpoq. Aperisariaqarpugut ilumut taamatut allannguisimaneq demokratiip isaanik isigalugu siuariarnerunersoq. Ullumikkut illoqarfiit ilaat inukinnerusut qinigaatitaqanngillat.

Kommuunerujussuit pilersinneqarmata illoqarfiit ilaasa toqqaannartumik qanimullu sullinneqarnerat oqartussaaqataanerallu innuttaasut peqataatinneqarnerunissaannik isummamut innarliisimasutut oqaatigineqarsinnaavoq. Inoqarfiit, illoqarfiit nunaqarfiillu ilaasa misigaat qulaaninngaanniik aalajangiineq pisartoq.

Demokrati inuit ilaannik oqaatigineqartarpoq, tassagoq amerlanerussuteqartut oqaasissaqarnerunissaannik qulakkeerinninnerusoq. Taamaakkaluartoq ikinnerussuteqartut tamatigut tusaaniarneqartarnissaat peqataatinneruneqarnissaallu pingaartittariaqarpoq.

Ullumikkut Inatsisartuni udvalgit inuttalerniarnerini d'Hondtip agguariaasia najoqqutaralugu inuttalersuisoqartarpoq. Naluneqanngilaq agguataareriatsip taassuma partiit annerusut annermik pisarmagit.

Demokratiskimik eqqarsartarneq ineriartortuurtuuvooq, aammalu uani immaqa eqqarsaatigineqarsinnaagaluarpoq qinikkat tamagit, partiit tamagit, udvalgini ilaasortaasinnaanerat ilaasortaatitaqarsinnaanerallu qulakkeerneqartariaqartoq.

Partiit iluanni marloqiusamik ilaasortaatitaqartarneq demokratiip isaanit isigalugu aamma ippinnartoqarpoq. Inunnut ataasiakkaanut oqartussaaqataaernerik siaruaaneq nukittuunngortitsisinnaagaluarpoq. Ullumi inuit politikerillu ataasiakkaat marloqiusamik inissittarnerat annertunerusumik tunngaviusumillu oqallisigineqanngilaq.

Aperisoqarsinnaagaluarpoq: ilumut taamatut sullissiniarneq demokratip anersaavanut naleqquttuaa?

Ukiorpassuit ingerlaneranni Nunatsinni aamma demokratiip eqqukkiartuaarneqarnerani tamagit peqataatinneqarnissaat qulakkeerniarlugu ineriartortitsisoqarpoq, sulilu taamatut ineriartortitsineq ullumimut ingerlaavarpoq. Suli tamatuma tungaatigut suliassaqarpugut.

Ullumi ulloq Nunatsinni demokratiip ulluattut taallugu ullormi tassani inooriaatsitta aqutseriaatsittalu eqqartorneqalerluni ingerlaavartumik pisalernissaa immaqa eqqarsaatigineqarsinnaagaluartoq.

Demokrati naalackersuinikkut, aqutsinikkut, suliffeqarfinni sumilu tamaginni siammarsarneqarluni pissappat tamanna naleqqutissagaluarpoq.

Taamatut naatsumik oqaaseqarlunga Nunatsinni innuttaasut tamaasa pilluaqqorusuppakka tamagit oqartussaaqataaernerata 1967-imi annertunerulersinneqarluni aamma inatsisartoqarnitsinnut apuunneranit ullumi ukiut 50-inngortorsioratsigu. Tamassi pilluaritsi, tamatta pilluarta!